

四庫全書

集部

欽定四庫全書

弇州續稿卷八十

明 王世貞 撰

文部

史傳

中山王世家

中山王徐達者鳳陽人世業農至達而少有大志好武
事達為人長身高顴赤色沈毅剛決其儕伍咸莊憚之

時郭子興據濠梁稱滁陽王而高帝為其部帥用事達杖劍往從之一見語合收置麾下嘗從畧定遠張家堡得其兵三千人已又從襲橫澗山寨得兵二萬人時達年二十二矣所委使必効而又時時以王霸之畧進高帝大悅曰此國器也授鎮撫俾位諸宿將上尋從破元兵於滁州澗再從取和陽拒殲其援師皆有功而賊帥孫德崖來與子興合已復有隙軍且闕高帝乃馳車騎往撫之為所執而子興前已誘執德崖於是達請以身

之德崖軍代曰歸我朱公子我亦歸而孫帥高帝始得
脫而子興業飲德崖酒縱之返達亦得脫會滁陽王死
高帝為大帥達益重從下俞通海等水寨與曼濟哈雅
相距達別率精兵數千取溧陽溧水二城斷其肘諸軍
前薄曼濟哈雅軍大破之從渡江拔采石搗太平與常
遇春皆為軍鋒冠而達獨叅預密謀進止尋從破擒元
將陳頤森復大破曼濟哈雅乘勝下集慶路高帝稱吳
國公欲將達而少之乃會諸將陽責達等以不能戢下

召軍正使定罪達等頓首請死乃赦之而命達率諸將
攻鎮江一鼓而下走苗帥旺扎勒穆平章鼎鼎號令明肅
城中偃然不知兵達自是專為將矣置淮興翼元帥府
於鎮江達領之時張士誠王平江誘我降將陳保二以
叛遂發舟師自常州來逼達禦之敗其軍於龍潭追奔
至常州請益師于高帝曰賊窘矣可破而有也上以兵
三萬益達達乃分其軍為三薄常州而壘士誠之弟平
章士德以卒數萬來援達與諸將計曰士德勇冠軍且

狡未易力勝也去城十八里為三覆以待而別選鉄騎
屬總管王均用將之乃前徼士德兵既交均用鉄騎橫
其中堅陣亂士德走遇覆馬蹶獲之遂大破其軍殺酋
以萬計進圍常州不下高帝乃故奪元帥達以下一官
而賜書達曰虐降失陳保二老師孤城吾所以重過將
軍也將軍勉思補前過大善不者三尺不貸汝因復益
以精兵二萬而新附長興卒七千人從其帥叛降士誠
達乃殺圍合四營兵為二以相救佯示弱狀士誠兵直

攻達達縱兵大戰而外營常遇春來應夾攻大破之凡五月而常州下達別將輕兵取馬馱沙以為靖江縣進攻寧國府破走其將謝國璽寧國守臣楊仲英等堅守不下高帝以大兵繼之仲英降得士卒十餘萬人馬二千疋復以輕兵徇宜興縣別道下常熟距平江不百里而軍平江大震已復與平章邵榮圍宜興分兵塞太湖口援道絕宜興下時高帝以重兵定婺源將畧有浙東諸郡而陳友諒之大將趙普勝以兵陷池州復進據攢

陽水寨數往來窺伺高帝念不及援而達遣其將選精卒襲敗之普勝棄舟走復追擒其部將獲艤舳數百遂復池州捷聞高帝大悅謂微達何以紓我內顧超拜奉國上將軍同知樞密院事亡何高帝取無為州達以兵自無為夜掩浮山寨破趙普勝之別將胡總管於青山窮追至潛山復破斬陳友諒之郭叅政下潛山分兵守之達還鎮池州而高帝諜知陳友諒且犯池命僉樞密院常遇春以兵來助使使語達友諒旦夕至則重覆於

九華山之下而掩其後可盡取也達乃與遇春筴選卒萬人伏九華友諒至盡銳攻城城中伐鼓大噪伏盡發而城中兵應之遂大破其衆斬首萬餘級生獲三千人遇春曰此勁敵也不殺為後害達不可以狀聞高帝報使者天下戰方始毋多殺多殺是逆距之也而遇春則以夜阮其十之九上不憚命悉縱其三百人歸友諒而曰此吾不壹將之故也達自是專為大將矣陳友諒既陷我太平遂盛兵壓建康高帝設奇大破之達時將南

門外兵功最多遂與馮國勝等追之及於慈湖縱火焚其舟至采石復躡其黑旗軍復太平遂取安慶尋從高帝取江州陳友諒走追破之別將兵屯漢江之沌口遏沔陽戰艦進中書省右丞洪都降將祝宗康泰反大帥鄧愈走達以沌口軍還討定之宗走死檻泰送建康達移兵圍廬州而亡何友諒失洪都而憤悉其衆來爭樓船高數丈圍之數百重高帝亦悉師溯流逆之趣召達自廬來會與友諒遇於鄱陽湖達先諸將蕩其前茅殺

千五百人獲一巨舟而還軍威振既而達舟深入中敵火撲之更進戰復破敵而退時友諒兵尚盛帆檣後先不見際高帝憂之謂左右即不利柰彼乘勝何既而曰得之矣吾以達留守緩急可百全也夜以兵符授達飛舸還建康達至申約束嚴斥堠示以鎮靜若不知有外兵者而高帝已破誅友諒矣師還即吳王位置中書左右相國正一品時猶仍元故尚右而達為左相國拜日上召而諭以元政之所以失且用怠終為戒達等頓首

謝復從平武昌還復諭達等以更涉世故則智明久歷
患難則慮周今者紀綱法度粗若有緒顧其間或未盡
善諸公宜執正論為更張毋使有既往之悔於是達與
右相國李善長相與孜孜推明之稱畫一焉亡何率兵
討廬州左君弼君弼走安豐遂取廬州獲其驍將張煥
以君弼妻子送建康進兵下安豐君弼走汴梁亡何率
兵徇友諒屬城之在荆湘湖南北者兵至荊州友諒守
將姜珪降遣叅政傅友德徇夷陵歸州守將楊以德楊

興先後降狗潭州土酋易華降狗辰州守將周文賁不降破之文賁走狗寶慶守將唐隆如文賁破之隆走湖湘平召還大會師建康計所討率常遇春等以水陸兵狗張士誠淮東郡邑首克泰州得其將九十兵五千遂狗興化降其敗將李清會張士誠犯宜興以都督馮國勝攻圍高郵常遇春攻淮安別將守泰州而達率中軍精卒渡江走宜興破擒士誠兵三千餘宜興圍解國勝中高郵守將詭約降使使入受之皆見殺上怒撻國勝

而趣達移兵會攻克之俘其將帥千餘人卒稱是復移
師會常遇春攻淮安破其左丞徐義兵於馬騾港獲卒
三千舟百艘遂進薄其城守將梅思祖降獲兵萬餘馬
千五百疋糧四萬石元將樞密同知陸聚舉徐宿二州
以歸時安豐復為元守達進師取之獲其右丞錫都走左
君弼元將珠展來援大破之獲其兵四千馬千疋大相
庫庫特穆爾窺我徐州達復大破之所俘斬萬計淮南
北悉平高帝與諸將相謀討張士誠右相國善長以士

誠兵尚強饒蓄積請緩之達持不可曰張氏汰而苛諸
大將李伯昇輩積子女玉帛旦夕人耳用事者黃蔡葉
三叅軍白面書生易與也臣奉上威德以大兵威之當
自潰上大悅曰子吾身也以左相國達為大將軍平章
軍國重事遇春為副將軍率師二十萬討士誠禡於龍
江進達等諭以母虜掠母殺僂母發丘壠母毀廬舍又
戒之曰士誠能以吳歸命者必全之吾聞其母葬閭闔
之外墟母據而芻牧也時副將軍遇春欲徑擣平江上

曰不然賊分其衆駐吳興錢塘以自輔我頓兵堅城不克而招二輔之援非計也先攻吳興便乃悉舟師自太湖趨薄吳興士誠之右丞張天騏叅政黃寶院判陶子實分道出戰達亦分兵應之而遣驍將王國寶以長槍軍扼其歸路黃寶敗走遇春扼之而獲其從卒多死天騏等餒遂退其司徒李伯昇潛兵以入達復敗之遂圍其城五太子及其平章朱暉僉樞密呂珍以兵六萬來援屯城東之舊館達遣遇春等為十壘隔之復敗右丞潘

元紹兵士誠自以兵來援達逆戰大破之獲其戴元帥及甲首三千士誠走復破其同僉徐志堅獲之鹵甲卒二千復破潘元紹之赤龍船於平望鹵其軍資甲伏皆盡復大破舊館之援兵五太子及朱暹呂珍降盡得其全師六萬以徇左丞張天麒等降李伯珍亦降吳興下遂下吳江州從太湖西出平江城南七里破鮎魚口山柵復敗其兵於尹山橋遂悉水陸兵薄平江達營封門分兵營婁胥閭盤諸門築長圍木塔與城中浮屠等為

別築臺三成曰敵樓下瞰城中纖悉皆見尋使使之建
康請事高帝賜璽書勞之曰將軍自昔相從忠義天性
沈毅有謀端重且武用能遏絕亂畧消弭羣雄今剋期
來請事事取稟命將軍之忠吾甚嘉之然將在外君不
御乃古道也自後軍中緩急將軍便宜行之勿以聞松
江降尋為其豪錢鶴臯乘間殺攝守以叛衆至三萬人
達遣兵討平之誅鶴臯平江城堅難卒拔而莫天祐時
為士誠守無錫相唇齒其將楊茂善泗數從水中消息

達徼得釋而厚賞之以為心膂使往來為間因盡得其
虛實士誠迫乃自出兵戰復大敗之士誠馬驚墮水幾
不救肩輿入城而其弟丞相士信張幕城上踞銀椅進
秋桃未及嘗而飛礮碎其首士誠氣益奪久之達謀知
城中困乃勵士鼓而破葑門遇春亦破閭門新寨其樞
密唐傑等皆降遂大潰士誠收其餘兵二三萬巷戰復
潰馳歸拒門自縊久之蘇檻送建康卒以縊死達之將
破城也與遇春約曰師入吾營而左公營而右將士人

予一牌曰掠民財者死毀民居者死離營二十里者死
師入而民不知有兵食寢互市如故竊相咎曰奈何久
抗王師達乃遣輕兵渡江下通州歸獻俘於戟門進封
信國公賜綺帛改官儀尚左達為右相國尋改相國為
丞相達為右丞相亡何議北伐平章遇春請直擣元都
執孱主以臨天下高帝曰壯哉而昔所畫下平江策也
吾欲先取山東撤其屏蔽旋掩河南斷羽翼拔潼關而
守之天下形勢入我掌握不待廩牧野而元都下矣鼓

行而西雲中九原以逮關隴可席捲下也達曰上策之
善高帝顧曰兵法以廟筭勝者得筭多也卿其識之於
是信國公達為征北大將軍鄂國公遇春副之禡於北
門七里山大會諸將謂諸將軍非不健鬪然能持重師
有紀律戰勝攻取得為將之體者毋如大將軍達又謂
達閩外之寄汝實任之茲行進取必自山東始大將軍
至淮諭沂州帥王宣與其子信請降既而叛襲走我使
臣徐唐臣等達怒急攻下沂州僂宣與其叛黨十餘人

王信走高帝勞大將軍達賜書曰將軍今何嚮嚮益都則必以兵扼黃河斷其援即不嚮益都西取濟南濟寧二郡便兵難踰度其在將軍吾不從中制也金火二星會於丑分後火逐金踰齊魯以時進取毋失達遂率兵攻圖益都降其平章拉必遂徇濰膠壽光臨淄等諸州邑因兵威諭降樂安淄川守將前後得將卒萬二千糧二十餘萬石移兵下東平籍其兵民五萬進次安山獲石丞杜天祐等糧艘百五十餘逼濟南走其大帥托音

特穆爾獲將卒二千八百進逼濟寧走其大帥陳平章以都督張興祖守之遂與副將軍遇春兵合取東昌所屬州邑皆下敗元少保伊蘇兵追奔八十餘里擒其大將藉山東城邑俘獲軍實之數上之高帝即大位立皇太子達兼領太子少傅授銀青榮祿大夫上柱國錄軍國重事丞相公少傅如故予告所以推揚勲畧甚至比之太公鄧禹云達以大兵渡陳橋取汴梁時左君弼竹昌皆走之守將國公李克彛所克彛謂君弼公在廬

數與南師角若何我悉麾下授公能與之戰否君弼曰
是未易當也有徐相國者善用兵我見之輒膽落何能
戰克彛乃驅兵民夜開門北走而君弼與竹貞率所部
迎降大軍入其城遂由中灤進畧洛陽遂抵塔兒灣元
將詹同托音特穆爾以兵五萬來拒副將軍遇春突斬
其前鋒達麾兵乘之南風驟發塵起呼聲動天地元兵
潰追奔五十餘里俘斬無算洛陽大帥梁王阿魯威以
其金印從吏民出降河南平阿魯威者故潁川王察罕

特穆爾父也達乃遣副將軍遇春徇嵩州都督馮宗異
康茂才徇陝州福昌陳許諸守帥皆請降遂西克潼關
而守之遣使之太原諭降元丞相庫庫特穆爾遂徇號
州毛葫蘆諸寨致其兵自益庫庫來報聘以白金文馬
為饋受馬反金送其使建康高帝聞達等平河南為幸
汴梁以待之居十日達自軍謁行在上置酒勞之曰將
軍哉忠爾忘身國爾忘家斯之謂歟河朔士民忍倒懸
以待將軍將軍宜以時進兵建勛立業此其日矣達與

諸將頓首謝既退復召達問計達對曰大兵平齊魯掃
河洛庫庫自保之不暇而敢離其壁我西據潼關李思
齊張思道覬奪遠竄元都卒旅且駭逸耳誰與為臂指
者臣不佞仗天威取之如拉朽因復奏曰師進而彼北
奔不窮跡之將為異日憂上曰元世祖乘氣運而王我
中國今衰矣彼且自漸盡何煩我窮兵出塞之後固守
疆圉防其侵軼可也達遂拜命次河陰副將軍遇春來
會仍移頓陳橋高帝畫陳圖以賜調益都徐州濟寧諸

裨將悉集達復入汴梁辭已分兵徇河北右丞薛顯叅
政傳友德兵至衛輝攻之平章龍二走彰德追之至彰
德龍二復走遂併取彰德尋取廣平大將軍達駐臨清
分遣傳友德開陸道通步騎都督顧時濬河通舟師遂
前下德州常遇春張興祖兵悉會取長蘆滄州擣直沽
據之作浮橋以濟師丞相伊蘇不戰走元都大震抵河
西務敗其平章阿爾格等獲士馬無數遂進抵通州與遇
春夾河而軍達軍東岸遇春軍西岸遇春敗其西岸兵

擒國公巴延特穆爾等諸軍入通州夜三鼓元君及其
后妃太子開建德門以其車服重寶逃踰五日達進師
填濠入陳兵登齊化門執其監國淮王特穆爾布哈居
守太尉左丞相強通平章德勃必實保賽音布哈右丞
張康伯御史中丞瑪爾通等數以奉職無狀且不先納款
僂之封府庫籍其圖書金玉楮幣以兵千人守宮殿門
使宦寺監護其宮人妃主給餼廩無缺吏士一切安堵
市不易肆已遣指揮革雲龍經理故都城垣右丞顯叅

政友德平章曹良臣都督顧時率驍騎偵邏隘口楊鎮撫以舟師守直沽捷聞詔達與遇春定山西遇春以兵先下保定尋下河間下真定而右副將軍宗異已定懷慶度太行取澤潞大將軍帥大兵繼之使右丞顯叅政友德以鈇騎為前鋒畧平定州而比時庫庫特穆爾兵方自保安謀踰居庸關撼故都達聞之謂諸將曰庫庫兵遠出太原必虛北平孫都督擁六衛之師足以抗禦我直抵太原覆其巢所謂批亢擣虛也太原下擴廓不

戰潰矣諸將皆曰善遂以輕騎前抵太原而營庫庫還
軍來救鋒銳甚副將軍與達計以步兵未集而輕與勁
此危道也敵不解遠斥堠固營壘可掩而取也達善之
而會庫庫部將呼必瑪勒者來約降且請為內應乃選精
騎銜枚夜襲之庫庫方然燭使二童子挾書以待卒聞
警倉皇不知所為跣一足乘驛馬以十八人走大同呼必
瑪勒降達次日建大將旗鼓按其營得甲卒四萬馬四
萬足兵乘勝之大同庫庫遂走甘肅復遣顯友德以步

騎徼破賀宗哲於石州而身率兵自霍下平陽河州府
山西悉平遂渡河廊城守將迎降克同州留兵戍之趣
鹿臺時奉元為都省而平章李思齊據鳳翔張思道與
孔興圖魯卜據鹿臺各有重兵以衛奉元而思道等聞
達兵至三日遁達遂進渡涇渭至三陵坡父老千餘人
出迎達撫慰之遣左丞周凱入申約束明日師進奉元
其約束如下故都時秦民大悅以奉元為西安府副將
軍兵逼鳳翔李思齊走臨洮鳳翔下達與諸將議所攻

皆以張思道才不如李思齊慶陽易於臨洮請先由豳
州取慶陽後度隴攻李思齊於臨洮達曰不然思道深
壁固壘城險而兵精卒未易拔也臨洮北界河湟西控
井絡地富而人衆以大兵蹙之思齊不走絕徼則有東
手降耳思齊降全陝皆我有矣遂決策度隴克秦州走
其將呂德張義至鞏昌總帥汪凌沁布平章梁子中商
嵩等降遂遣馮將軍以天策羽林諸衛驍騎逼臨洮李
思齊降得其衆十餘萬乃以兵攻靖寧走知院杜拜布

哈度六盤山襲走豫王盡獲其部落騾重使使喻慶陽
張思道懼而留其弟良臣以兵守而從輕騎跳之寧夏
遇庫庫特穆爾為所執良臣聞之使使納款達遣右丞
顯率騎士五千步卒六千往受降良臣自疑以兵來者
豈其捕誅我乃佯為蒲伏道左獻牛酒而夜襲之顯被
傷走達怒甚即日以大軍圍慶陽而分布精騎使平章
俞通源畧其西都督顧時畧其北叅政友德畧其東都
督陳德畧其南慶陽援路絕達進逼西門矢石雨下不

為動良臣出兵盪靡壯士摧敗之悉捕斬其伏聽及請
援者已復徼其兵出採汲者悉獲之良臣懼登城請降
不聽復遣兵擊破庫庫之救者哈札爾圖益急其平章
姚暉等開門納師良臣父子投於井出而斬之并誅其
黨二百餘人陝西悉平詔達還京師第功宴諸功臣以
達為首稱其攻取山東河南燕冀秦晉等處州郡克敵
致勝振揚國威撫綏軍民得大將體賜白金五百兩文
幣五十表裏且大論封而會庫庫特穆爾覘達還遂悉

兵襲我蘭州不克尋敗我援師殺指揮使于光時左副將軍遇春卒上乃還達大將軍印而以平章政事李文忠代遇春分兵為二大將軍自潼關出西道擣定西以取庫庫左副將軍自居庸出東道從大漠取元嗣主達受命即日行遂至定西庫庫退屯車道峴達進師逼之駐沈兒峪隔深溝而壘日數交庫庫發精兵千人由間道從東山下潛刼東南壘舉軍皆驚擾左丞胡德濟倉卒不知所措達自率帳前卒擊之敵始退德濟故功臣

越公大海子也達械之送京師而斬其部下趙指揮數人以徇餘衆皆股栗明日達乃整兵奪溝而戰以身先諸將士諸將士毋不奮前角者呼聲動天地遂大破之川北亂塚獲其郊王濟王閭國公平章哈扎爾和爾齊等文武僚屬千八百六十餘人士卒八萬四千五百餘人馬萬五千三百疋橐駝羸驢牛羊以鉅萬計庫庫脫身與妻子以十餘騎遁沮黃河得浮木以渡遂由寧夏奔和林德濟械至京高帝釋之而以書諭達謂將軍自

效衛青不斬蘇建耳獨不見穰苴之待莊賈乎將軍誅之則已不誅吾且念其信州諸暨功不得不曲赦以伸吾不忍自今而後將軍毋事姑息達既已破平庫庫乃使鄧將軍因兵威脇降西蕃而自攻興元復取之會左副將軍亦以兵襲應昌盡得元嗣主之嫡孫后妃將相寶玉士馬車服無筭先後露布聞詔振旅還京既至高帝為幸龍江勞之所以慰賜有加授開國輔運推誠宣力武臣特進光祿大夫左柱國太傅中書右丞相叅軍

國事進封魏國公歲食祿五千石予告及鐵券免三死
子免二死仍世世勿絕賚文綺帛百疋是歲辭判省事
右丞汪廣洋代之明年復佩大將軍印鎮北平以便宜
徙山後順寧等處軍民戶三萬五千八百口一十九萬
七千餘籍為軍者給月廩為民者給田以耕凡置屯二
百五十四定墾田一千三百四十三頃北平軍府之用
皆賴之十二月受詔還京師十餘日高帝召達與曹國
公李文忠宋國公馮勝宴射而賜之交趾弓五十彤弓

百因諭之曰古者諸侯有四夷功賜之弓矢達等謝上
若注意者再歸而相謂天下甫息肩得無又有大興乎
甫旬日而高帝御武樓與計邊事曰庫庫游魂尚出沒
奈何達乃請曰亟發兵阮監子耳度兵幾何曰十萬足
矣上曰吾予爾十五萬騎大將軍出中路文忠以左副
將軍出東路勝以征西將軍出西路將各五萬騎轉餉
私役者不與焉達抵山西境都督藍玉為前鋒敗其游
騎於野馬川復敗庫庫於圖喇河庫庫遁與賀宗哲合

而拒我師於嶺北時師數發欲而心易敵驟與之戰不利死者萬餘人達固壘而收之故徹侯功臣無死者敵亦不敢入塞而偏將軍湯和遇它敵於斷頭山亦敗左副將軍出塞至口溫雖少利而道遠乏水其後軍亦為敵所掩失徹侯曹良臣大校數人然得其士馬輜重畧相當獨征西將軍與副將軍友德至西涼屢破敵盡收其妻子以私匿馬馳故賞不行而上以達功大弗問也自是達連歲出鎮北平歲行盡即召還上將印賜休沐

以時宴見懽飲有兄弟稱而達愈恂恂恭謹嘗從容謂徐兄功大未有寧止欲以吾吳時舊邸居若達固謝不敢一日與之邸強沃以酒醉而覆之被舁卧正寢醒而驚輒俯伏階下呼死罪上益悅命有司治甲第表其坊大功曰今天下後世毋忘爾達長女得尚燕王王高帝愛子也國于北平故達歸將印之不踰月輒復之鎮時北敵漸衰弱而亦畏達威名稀敢復犯邊達亦戒守邊者唯繕城戍簡士馬謹烽堠而已毋得輕徼外功啟釁

故終達之鎮北平十餘歲兵民熙熙有太平色燕王有三子皆達女出親為王舅與天子夷輩而見必執臣禮不少間王以是心念之又得其用兵法所練士皆選後從王起靖難立大勛績要非偶然者胡惟庸為左丞相憚而貪以達元勲貴重欲因以內好達惡之不答則賂達間者福壽使為間以圖達福壽發之達亦不問惟時時為上言惟庸不可過委過委必敗後惟庸反高帝以是益重達而其後自北平疽發背小愈上使達子允恭

視之賜璽書謂今九夷八蠻大者畏力小者懷德非將
軍何以臻此且召之歸疾益甚高帝憂之為延致天下
名醫復禱於山川社稷城隍之神願假大將軍息數載
以寧萬姓吾他日與之同往竟不起年五十四高帝袒
跣奔達寢撫屍而慟尋輟朝愴然謂羣臣大將軍為朕
股肱心膂力行陣東征西討削平羣醜克濟大勲邇
者太陰婁犯上將萬里長城一旦奪之悲夫盡心國家
為社稷重者寧復有大將軍吾何以報之但著其勲烈

宣于金石永垂不朽耳贈達中山王謚武寧追封其三
代皆中山王而手書其混一區夏奠安神人之功於墓
道且曰婦女母所愛財寶母所取忠志無疵昭明乎日
月惟大將軍一人而已自達薨高帝所授大將印獨宋
國公勝涼國公藍玉而潁川侯友德以功進封公其受
朕亦數然上待之不能如達諸所飭厲唯稱中山王或
中山開平二王而燕王即帝位為太宗舉中山王以勵
諸將軍者不一達慮精而言簡令出不二諸將奉之若

神明而善拊循其下同甘苦士不飽不就食不營止不就幄傷病者躬慰問給醫藥死者哭而棺槨之得壯士與謀輒不殺以恩結其意皆為我用所平二大都三會省望郡縣邑以百數無敢有擾民者歸朝上符印單車垂橐以還邸舍生平無聲酒伎媵之好親禮儒生與談經術古事雍容如也始高帝郊祀後即建功臣廟於雞籠山圖達戰功與太廟配享位皆第一達有子女各四人曰輝祖曰添福曰增壽曰膺緒添福早卒膺緒初為

尚寶卿遷大同中衛指揮僉事再遷中軍都督僉事奉
朝請太宗朝輝祖增壽皆前卒而膺緒以元舅見尊寵
仁宗初拜膺緒子景珩中軍都督僉事景璿金吾前衛
指揮僉事諸孫為指揮勿絕其二女皆為王妃輝祖初
名允恭長八尺五寸有材氣起家勲衛署理左軍都督
府事月給祿二十石達薨之踰歲而賜今名襲公數遣
往北平山東河南練兵治餉還領中軍都督府建文帝
即位之未幾而燕王以屬尊見疑輝祖其親婦弟也王

之次子高陽王高煦時留京師邸竊輝祖善馬逃輝祖
遽以聞建文帝以是益親信之輝祖亦秉節無二進兼
太子太傅燕兵渡京口輝祖猶與開國公常昇等分道
出戰獨力王下京師獨弗迎以是文武羣臣論劾輝祖
削爵勒歸私第尋下緹騎獄者五年而卒益死仁孝皇
后亦弗敢請嗣至十八年而上念達功大且以故后恩
俾其子欽襲爵盡還其誥券歲祿賜田明年來朝不待
命辭上猶恨之復削爵徙鳳陽仁宗即位欽復來朝詔

復故爵尋卒子顯宗嗣嗣二十三年而卒無子弟承宗
嗣婁領軍府提督南京守備加太子太傅矜嚴有威練
達政體嗣十六年而卒子輔嗣九再督南京守備持重
善為容南中士民熟稱之加太子太傅嗣五十二年而
卒贈太傅孫鵬舉嗣鵬舉之生也輔夢宋岳鄂王飛入
其室故以字名為人溫厚長者九三領軍府督守備加
太子太保晚節嬖其妾奏立為夫人欲以其子邦寧稱
嫡會有所格不得立立其庶長子邦瑞鵬舉嗣公九五


十二年卒邦瑞嗣督守備尋以病辭自顯宗嗣而高帝
孝陵在留京者以懿戚世世奉祀文皇初即位以一中
牢告中山王其後因之增壽以父任三遷至左軍左都
督侍宿衛建文帝業以持燕王事從容謂增壽王得無
反乎增壽頓首曰燕王先帝同氣且富貴已極何故反
燕師起則時時從增壽詢虛實增壽亦時時從王所輸
款建文帝漸覺之未及問而燕師從金川門入召增壽
詰之不對手劒斷增壽腰燕王入撫屍而哭既即位封

增壽為武陽侯再追封定國公俾子景昌嗣歲祿二千五百石久之領軍府嗣九三十五年而卒子顯忠嗣十二年卒子永寧幼又七年而嗣疾失心子半祿罷朝請病二十六年卒子光祚嗣久之領軍府以東宮舊恩超進太傅旋以監脩武睿二朝實錄成累加太師兼太子太師凡四十五年卒子延德嗣領軍府四十餘年卒子文壁嗣領軍府加太保太子太傅嘉靖中詔裁恩澤世封而魏定二公皆自以功弗奪有言定公功不稱者卒

弗奪也天下僅五公達子孫居二焉

弇州外史曰高帝之取天下計初下建康再與陳友諒
角實在行而其它十七皆大將軍力也大將軍之廉靖
仁武沈幾筴勝即古名世之佐曷過焉勞而不伐夙夜
匪懈與功名終蓋所以處君臣之際微矣元女侑配英
主整其成師於十五年後而資靖難兩都二公光表後
裔寵冠羣辟夫豈幸哉儒生之第武者輒先太公望夫
太公因累世之聖奉以伐至不仁牧野一戰倒戈攻北

無所藉於鷹揚而殷社栗矣土一胙而疾驅於安丘之
逆旅舉賢尚功汲汲以為齊百世計孰與夫大將軍受
賑而忘其家誓衆而忘其身論爵第賞而忘其子孫哉
吾故持標而昂之以為古今勲臣第一云



弇州續稿卷八十

欽定四庫全書

集部

弇州續稿卷八十二

詳校官編修

臣

潘廷筠

中書

臣

劉源溥覆勘

總校官進士

臣

楊懋珩

校對官檢討

臣

龔大萬

謄錄監生

臣

甄輔廷

欽定四庫全書

弇州續稿卷八十一

明 王世貞 撰

文部

史傳

開平岐陽寧河三王世家

開平王常遇春者濠之定遠人其先世世為農家遇春
長身白皙有膽力猿臂善射元末羣盜起躡江淮間而

盜魁劉聚者得遇春而識之使為什夫長有所攻剽遇春敢力深入必剋獲而歸以是為聚所愛重而遇春察其急鹵掠毋遠志屬高帝駐兵和州乃偕其私卒數十來歸居兩月未有所見自請為先鋒上曰爾饑故來歸耳且有故主在吾安得奪之遇春頓首泣曰劉聚盜耳無能為也倘得効犬馬之力于知者雖死猶生上猶弗許曰能相從渡江乎取太平而後臣我未晚也既渡江抵采石磯元兵置陣于磯上舟相去者三丈餘矢刃蜩

集莫敢登遇春飛舸至上麾之應聲挺戈躍而上敵皆
披靡帥師乘之大敗其衆遂乘勝取太平始授總管府
先鋒無何進為總管上既已渡江而諸將士家屬輜重
皆在北滁和之守備單而元中丞曼濟哈雅擁舟師數
萬襲據采石界其中間音問絕上率大衆攻之使遇春
多張疑兵以分其應而自帥正兵搗之既合而遇春別
操輕舸以精兵橫衝哈雅之舟分為二左右縱擊大破
之悉俘其精銳自是元師扼江之勢衰而南北通矣遂

從收集慶路再從徐達取鎮江復為領軍先鋒徐達攻
常州而降卒叛與張士誠合而圍達命遇春以師援表
裏擊士誠大破之擒其梟將張將軍復為總管遂進統
軍大元帥克常州遷中翼大元帥尋從徐達下寧國分
兵取馬馱沙遂取池州戰功最進行中書省都督馬步
水軍大元帥從上取婺州復有功進鎮國上將軍同僉
書樞密院事守婺州遂以其兵攻衢州衢州下其院判
張斌以卒萬人降克衢州進僉樞密院事移兵攻杭州

久之張士誠兵來援累戰戰不利召還京師尋從徐達守池州大破陳友諒之衆語具達傳陳友諒入寇薄我于都城之龍灣上設伏大破之遇春功復最上追友諒于江州遇春留守用法嚴軍民肅斂進行省叅知政事復從上追友諒于安慶遂取江州還督龍灣寨之師張士誠之大將李伯昇圍我長興援兵遇之敗長興圍急上乃遣遇春以大軍援之兵至伯昇拔營遁俘斬其後軍五千餘人城安慶破池州之叛卒羅友賢斬之餘

黨悉平上所任將帥其最著者三人曰平章邵榮右丞徐達與遇春榮最為宿舊且善戰既貴而驕有所不得志輒謀伏兵置酒要上飲而却之事發就縛上猶語諸將吾欲宥榮死以慰勞臣衆唯唯遇春直前曰人臣而以反名寧可宥臣誼不與之共生上乃飲榮酒流涕而僂之以是心益愛重遇春張士誠別將呂珍圍劉福通于安豐上救之師至而珍已破城殺劉福通矣其兵勢盛而連營水陸為戰守備甚嚴時汪元帥為前鋒拔其

中壘而據之會左右軍敗汪元帥兵欲出走阻于塹則
殊死鬪卒不可敗而遇春以精騎橫突其脅凡三合三
勝大軍乘之遂大勝俘獲士馬無算進圍安豐元將左
君弼自廬州來救徐達與遇春逆擊大破之遂移薄廬
州且下而陳友諒傾其國兵號五十萬來爭南昌圍之
數百重凡三月餘而上趣達遇春廬州之師歸遂從上
往救遇于鄱陽湖之康郎山達首敗其前鋒縱火焚敵
舟二十艘殺獲以千計而敵不退友諒太尉張瑄定遠奮

前犯上舟適膠淺事且迫遇春從傍射定邊中之始稍
稍引退上舟脫而遇春舟復膠力戰以脫明日復大戰
乘風縱火焚其舟數十里湖水盡赤友諒弟友仁友貴
等皆焚死連戰三日友諒之卒死者過半而我兵所亡
失亦畧相當既出湖口諸將佐氣稍稍奪欲縱之去遇
春獨不言上悟乃移舟扼上流而別出奇兵絕餉道凡
旬五日而友諒軍食乏其左右金吾將軍皆降友諒迫
以百艘突圍湖口而上蹴之自辰至酉友諒中流矢死

俘其卒五萬人斬及溺者三倍之乃班師飲至策勲以
遇春及廖永忠俞通海為首賜土田金帛過當復從上
討友諒之子理于武昌圍甫合而其丞相張必先自岳
來援遇春以五千騎逆擊破擒之必先友諒驍將也陳
理魄奪出降進遇春中書平章政事尋從徐達取廬州
始別將兵畧定臨江之沙坑麻嶺十洞牛皮等寨遂定
贛州下南安南雄韶州諸路師還取安陸襄陽復從徐
達克秦州已克高郵淮安徐宿安豐悉下之大發兵

討張士誠命遇春仍副大將軍達而行舟師出太湖擒其萬戶尹義等直趣湖州之昆山與士誠兵水陸勁鬪敵大潰遂薄其城飛車戰艦高皆與睥睨埒其丞相士信掃境內兵來援築壘舊館壓我師之背遇春率奇兵由大全港入營于東阡却壓其背士信急抽精兵搏戰遇春鼓將士立破之復破其援兵赤龍船于烏鎮士信跳舊館之卒降得六萬人湖州亦下遂進圍平江路數破其城中兵凡八月始克之縛士誠以歸籍其兵得二

十五萬時上猶稱吳王召見戟門所以慰勞備至進銀
青榮祿大夫上柱國錄軍國重事封鄂國公上念遇春
功大欲尊貴之而李善長徐達已為左右相國不能復
置相乃以遇春為平章軍國重事制祿秩與相國等復
議討中原遇春有所獻策語具徐達世家遇春之前議
討張士誠策亦如是大較欲輕兵直搗其心腹肢節當
自瓦解上持重不之用也而心伏其勇至是命遇春為
征北副將軍與大將軍達率步騎二十五萬以北上親

禡旗于龍江諭諸將當百萬之衆摧鋒陷陣所嚮披靡
無如副將軍遇春第吾不虞其不能戰虞其輕戰耳夫
遇春大將也而好與一小校爭能甚非吾所望也遇春
頓首拜詔既行吳王即皇帝位冊立皇太子以遇春領
其少保遇春師與大將軍合畧定山東諸郡遂破汴梁
走其帥李景昌進攻河南元兵五萬陣洛水北將合遇
春單騎突其陣敵以二十騎攢槊刺遇春遇春發一矢
殪當先者大呼而入麾下壯士從之遂盡殺其二十騎

敵遂大潰河南下諸郡邑悉平上為幸汴梁至之二日而遇春馳入謁上勞之曰將軍與大將軍北征不踰歲而下中原之半功亦大矣勞且倍矣遇春頓首曰亡元之民服上威德耳臣等祇奉成筭以效驅馳固大幸也上悅三日辭復往河南遂與大將軍畧定河北進逼其大都元主北走遂取之移兵徇太原元太傅河南王庫庫特穆爾自保安還師來援其鋒銳甚遇春與達謀曰我騎兵雖集而步卒未至驟與之戰必多殺傷且未易

決也夜却之彼必有走而潰耳達曰善夜却之庫庫果潰而走太原下改遇春為左副將軍居右副將軍馮宗異上出寨取大同轉徇河東西渡關下奉元路遂與宗異合而西逼鳳翔其平章李思齊率所部十餘萬眾奔臨洮鳳翔下會元丞相伊蘇以兵寇通州至白河而遁上乃遣遇春以所部馳至故元都部署將士而浙江行省平章李文忠副之遇春謀元主在開平乃選步卒八萬騎一萬取道三河經鹿兒嶺抵惠州敗其將江文清

于錦州獲士馬千計次全寧遂與伊蘇遇復敗之進次
大興州遇春使分千騎為八伏徼其歸大興之守兵走
伏發大敗之擒其丞相托和齊遂薄開平元主已前走
追北數百里俘其宗王慶生平章鼎珠等斬之凡得將
士萬人車萬輛馬三千匹牛五萬頭子女貨寶稱是師
還次柳河川暴得疾卒年僅四十上為震動喪車至龍
江親出奠為文哭之叙其功甚詳已而大慟始命有司
制聞大臣計用宋太宗為韓王趙普舉哀禮擇葬地鍾

山之陰明器芻靈凡九十一切皆官給不以煩其家仍
驛書報大將軍達使歸而會葬特贈翊運推誠宣德靖
遠功臣開府儀同三司上柱國太保中書右丞相追封
開平王謚忠武復推恩王其三代皆賜謚時猶襲元故
明年論功賜金幣一與大將軍等而封子茂鄭國公歲
祿二千石予誥券配饗高帝廟庭與祠雞籠山功臣廟
皆次大將軍為第二遇春為人沈鷲果毅撫士卒與同
甘苦皆樂為之用出則摧鋒退則殿後未嘗敗北雖不

習書史而用兵決勝與古人合年差長于大將軍二歲
數從征伐奉節制進止赴期不敢爽毫髮大將軍雅亦
推愛之終始無小間惟性稍好殺而淫以此不能比大
將軍而一時稱名將者猶曰徐常徐常云而上亦均重
之晚節每舉以勵諸將帥必曰中山開平二王不偏廢
也鄭國公茂者弱冠而封其婦父復為宋國公馮勝以
是益驕貴不練事上亦知之故不復使將封十七年而
隸宋國公勝比北征納克楚茂念諸徹侯位其下皆得

有偏裨任而已獨不得偏裨任邑邑不樂多不奉宋國公約束而宋國公兒子畜之數加責誚茂故慢辭以應宋國公恚而會納克楚請降詣右副將軍藍玉營讓酒與衣相忤納克楚悔欲出而茂直前搏之納克楚走茂復斫之傷而部卒頗有驚潰者宋國公得脩恚上書增飾其狀以為茂激變詔即軍械繫至京而茂亦列上宋國公貪淫不法事上乃收宋國公大將軍印而削茂爵安置廣西之某所然猶念遇春功別封次子昇為開國

公茂至流所而龍州守某土夷也慕茂家世以愛女事之而與他土夷爭為所發茂聞之伏毒死或云龍州守隱之他所實不死上為窮索茂且發大兵繼之而卒不得茂踪跡或云定死矣乃小解而昇嗣公之明年加太子太保建文末以抗靖難師得罪安置雲南之臨安以憂死子繼祖繼祖子寧寧子復弘治中錄六王後得拜南京錦衣衛指揮使子紹襲紹卒子經襲經卒子鳳襲鳳卒子玄振襲嘉靖中繼絕世封懷遠侯號為開國輔

運推誠宣力武臣階特進榮祿大夫勲柱國歲祿千石
卒子文濟嗣文濟卒子肩緒嗣

弇州外史曰高帝以神武定天下其臣皆莫及然至于
中山開平二王則心儀焉開平之甫定大業而不與其
榮宜帝之悲思之也世談開平之勇而誠意之謀皆怪
而陋夫嗚烏跳盪百夫雄耳彼豈知有所謂大將者夫
封鄂而謚忠武唐之尉遲氏宋之岳氏併開平而三大
將之材岳氏則吾開平伯仲哉

岐陽王李文忠字思本泗之盱眙人父曰隴西恭獻王
貞母曹國公主上之長姊也貞農家子無他長獨有醇
謹而公主歸之生文忠甫十二而公主薨時淮南北盜
起父貞携之東西走鋒鏑間幾不能活聞上已起兵滁
陽間關往投之至則相抱而哭皇子幼上多蓄童稚之
材勇者子之時文忠尚名保兒使冒國姓而從皇姪文
正列延師誨之讀書史傍習兵法上嘗携所業傳示幕
僚曰平世一卿士也雖然要當于馬上習之俾以舍人

從軍策應池州奮擊破陳友諒之卒驍勇為諸軍冠時
年僅十九無何以舍人率所部取青陽石埭旌德皆下
之敗元樞密院判鄂爾和於萬年街遂敗苗軍于於潛
昌化獲其婦女輜重甚夥文忠念士飽飲且驕夜潛殺
所獲而焚其輜重以激之曰患不力戰耳何患不富貴
乎遂前襲破洪元帥營降其衆千餘尋會鄧愈胡大海
之師取嚴州超為帳前總制親兵左副都指揮使兼領
元帥府事鎮之時嚴新下城壘未固而張士誠來爭挾

苗獠之衆水陸數萬人奄至文忠以輕兵從陸逆擊大破之馘其首標之槎而放之中流水兵見之亦夜遁遂克諸暨進浙江行中書省左丞苗將蔣英賊殺其帥叅政胡大海以叛文忠急擊破之蔣英走諸暨守將謝再興亦叛挾張士誠寇我東陽文忠馳救復破之再興走文忠以反側郡處兩叛間又與強敵接壤而練兵繕甲屹不可屈始文忠所築逼諸暨而城者曰新城士誠之司徒李伯昇悉兵號二十萬來圍新城文忠救之令去

城十里而軍新城之將來告謂賊勢盛不敵盍小避其鋒俟大軍至而後合擊之文忠曰俟大軍至城為彼有矣將在謀不在衆寡遂誓師而鼓之曰彼衆而囂我寡而整何彼之虞且聞彼之輜重山積矣是天以富賜若曹也勉之衆咸奮戰既合文忠橫槊引鐵騎數十乘高馳下直出賊陣斷其中堅賊列騎迎戰文忠手格殺數人縱橫搏擊所向草靡賊駭而亂相蹂躪大軍乘之城守兵亦鼓噪而出呼聲動天地無不一當百賊遂大

潰斬首數萬級擒將校七百人委棄鎧仗芻粟彌亘數
十里伯昇僅以身免自是氣索不能軍矣上召文忠歸
宴勞彌日賜名馬金幣甚厚進右丞使統全浙兵攻張
士誠之杭州取桐廬新城富陽進攻餘杭一夕而下之
叛將謝再興之五子降杭帥潘平章原明使其員外方
彛納款文忠詰之曰兵未交而遽納款得無姑為緩師
計乎彛謝曰王師所過秋毫亡犯杭之吏民鼓舞而慶
有主何敢緩文忠見其誠引之卧內與飲而授之約束

明日原明如師師遂入文忠營于麗譙下令曰敢有擅
入民居者殊死一卒下借民釜立礫以徇自是中外皆
安堵如故就加榮祿大夫行省平章政事還李姓上即
位封文忠父貞恩親侯食祿奉朝請上念姊已久死獨
貞在而又醇謹宴見不以時每有征行輒令守宮省文
忠既父子當腹心寄親重無與比尋討平閩之叛寇還
為偏將軍從開平王過春北討由遵化度鹿兒嶺進薄
上都克之走元君獲其士馬萬計語具開平王世家俄

而開平王卒于軍文忠代將詔移兵陝西與大將軍合而攻慶陽行次太原慶陽則已平而元東攻大同甚急文忠曰兵可無西也援大同便軍吏以為疑文忠按劍叱曰閭外之事吾得專之敢言不援大同者斬遂出雁門次馬邑敗其邏騎數千擒劉平章進次白陽門擒四大王前軍已去敵五十里而營文忠遽移之五里前阻水自固敵果夜率衆來却我不可動質明文忠望見敵益大至乃以二營委敵俾死戰久之度其饑疲乃選精

兵為左右翼奮擊大破之乘勝逐北擒其驍將圖魯卜
俘斬及降者萬餘人窮追至孟克朶而還論功賜金幣
當大將軍之半明年進征北左副將軍與大將軍分道
北討文忠以十萬人出野狐嶺進師既擒其平章都沁
謀知元順帝殂太子阿裕爾寶哩達喇即位其衆離文忠
喜兼程而進大破其候騎遂圍應昌明日破之太子走
獲皇孫密迪哩巴拉后妃宮人暨諸王省院達官將吏
等駝馬牛羊無筭并獲宋元玉璽金寶十五玉冊二鎮

主大圭玉帶玉斧各一選精騎窮追至北慶州不及而
還道興州降其兵民三萬七千人至紅羅山又降其兵
民萬六千餘人捷聞上大悅為御奉天門受羣臣朝賀
大封功臣文忠為開國輔運推誠宣力武臣特進榮祿
大夫右柱國大都督府左都督曹國公同知軍國事食
祿三千石賜誥券世襲尋領都督府事西蜀平命文忠
因兵威拊循其地還復以左副將軍北討出東路師至
哈喇莽賚元人遁文忠乃留輜重廬朐河人齎二十日

糧兼程進至圖拉河元太師哈喇章曼濟悉衆渡河留其妻子北嚮而嚴騎以待文忠力戰却之遂北至騁海敵來益衆文忠乃據險自固而多張疑兵以却敵敵疑稍稍引去文忠亦解而歸迷失道乏水渴死者甚衆文忠患之忽所乘馬跑土泉隨湧出土馬賴以俱濟文忠軍雖名為全而所失多得不足償而大將軍之出中路者竟敗績矣尋復與大將軍行邊嘗出朔州擒其太尉巴延布哈又嘗駐代縣分遣兵出至緞巴喇者俘其平

章陳安禮至順寧陽門者斬其知院戡矩魯至白登者
俘其國公鄧博羅特穆爾又破大寧瀉州斬其宗王托
多錫哩皆鹵子女人畜歸敵益避遠邊竟無事矣文忠
與大將軍皆折節延諸儒生講說經義彬彬而文忠尤
號有文采上益雅重之始命與李善長通知中書省大
都督府事御史臺事又命大事皆取二公處分中書省
革命文忠特叅軍國大計幾如大將軍又兼領國子監
事而文忠勸上少所誅僂微忤旨尋得疾二月增劇上

幸其第撫摩久之揮涕而別文忠卒年四十六贈岐陽王謚武靖父貞初亦封曹國公別食公祿前文忠卒亦贈隴西王謚恭獻有二子景隆增枝景隆生而長身偉姿疎眉目顧盼煒如既少奉文忠教齒諸生間與天台方孝儒善多習典故善談論每朝會進止雍容甚都上方亦目屬之既襲爵與魏國公輝祖等分鎮中原要害地所使多稱進掌左軍都督府加太子太傅上崩皇太孫立景隆益以肺腑見親任而增枝亦婁遷至左都督進

加景隆太子太師時兵部尚書齊泰太常卿黃子澄得
幸上謀削弱諸王至燕而露燕兵起長興侯耿炳文武
定侯郭英等攻之前後皆敗于是齊泰黃子澄皆才景
隆而薦之乃命景隆為征虜大將軍北伐用裴度故事
賜通天犀帶人主為推輪親送之江潁且令得以一切
便宜誅賞時諸宿將多物故鮮存者而存者亦已老又
皆景隆諸父行怏怏不肯為之下而景隆暴得意自尊
大每升帳踞高坐毋敢與抗禮者皆唯唯不能吐片語

而退景隆會兵五十萬于德州乘燕王之攻大寧遂進薄北平築壘九門為長圍以困之王還師自救景隆逆戰大敗死者十餘萬明日九門之師復潰死者復數萬乃退走王復攻大同景隆引兵出紫荆關時寒甚士卒墮指者什二三乃移書燕王請罷兵辭驕蹇王亦貽書來報而心恨之甚遂戰于白溝河北凡三日而景隆復大敗殺溺及被俘者幾三十餘萬景隆乃奔濟南燕王來追復大敗死者二萬餘濟南遂見圍以叅政鐵鉉堅

守不下始人主未知敗問與秦子澄謀以景隆權尚輕
特賜黃鉞金鉞朱弓矢使者渡江而風失之復製以賜
而景隆敗問至矣召還既陞見黃子澄慚憤極執景隆
于朝班慟哭請誅以謝天下人主莫能問也又二載師
屢覆燕兵悉渡江駐龍潭人主懼乃使景隆同尚書茹
瑄都督王佐來謁燕王以割地講和請王笑曰事至此
何地可割吾但欲得奸臣耳于是景隆等蒲伏密輸款
歸佐谷王守金川門燕王至景隆等開門逆之王即位

以景隆等默相事機改號曰奉天靖難階曰光祿大夫
勲曰左柱國增祿歲一千石其太子太師如故賞埒淇
成二公改脩高廟實錄為監脩總裁諸裁定功賞大興
革景隆猶以班首主議天子雖外示崇重而心恨之益
甚諸功臣咸扼腕謂彼白刃刺我而今以降虜而据我
上其又明年刑部都察院大理寺臣論劾曹國公景隆
包藏禍心蓄養亡命與其弟左都督增枝謀為不軌已
文武大臣太子太傅成國公朱能等吏部尚書蹇義等

復言之已六科都給事中張信等復言之乃下詔盡削
景隆勲階官號絕朝請勒歸私第猶以長公主故不奪
其爵亡何文臣羣臣復言訶事者至其家景隆猶坐受
閹人伏謁如君臣禮大不道復株及左都督增枝因詔
併奪增枝荊州帥符逮之與景隆同繫私第盡沒其莊
田寶貨圖籍臧獲入之官而所繫者皆親屬矣嘗絕其
食旬日不死始稍稍給食至永樂末而景隆竟以凍餒
卒正統中增枝猶在以恩例聽自便又數傳而其玄孫

璿為南京錦衣衛指揮使卒子濂襲卒子性襲嘉靖中繼六王後封臨淮侯勲號階祿同懷遠侯卒無子叔父沂嗣卒子庭竹嗣數領營府為漕事卒子言恭嗣好文學有岐陽王風委寄大約如庭竹

弇州外史曰岐陽王不數為大將將輒有功效敦詩說禮有儒者風斯所以肺腑哉高帝起民間屢更變饑兄之子獨大都督文正姊之子獨岐陽王而大都督不善居勲父子以廢徙而高帝念之不絕其國蓋二百年而南

面猶故也臨淮之紹侯其亦高帝遺意哉

寧河王鄧愈者泗州虹人父曰順興有三子長曰友隆
仲即愈愈生而有志及長貌魁岸勇力絕人元末羣
盜起江淮間順興從鄉里少年自保遂據臨濠與元兵
拒戰友隆代之復病死愈復代之是時年僅十六衆頗少
愈既出戰則先登陷陣無所不摧破衆乃喜曰使仲君
早將何至以首予敵而會高帝駐師滁陽愈自盱眙率
所部來附授管軍總管遂從渡江而南克采石取太平

元將陳額森合曼濟哈雅之兵凡數萬來見侵上禦之戰甫合而愈與徐達率奇兵繞出其後大破之獲額森曼濟哈雅走遂從下建康畧定溧水破鎮江愈功最多擢廣興翼元帥克廣德州長鎗軍謝元帥來攻愈出輕兵背城戰走之俘其總管武世榮馘甲首千移鎮宣州別將兵取休寧績溪與胡大海合而攻徽州下之走其將元之苗軍楊元帥以十萬衆來爭愈與大海勵將卒分道逆戰大破之虜其大校百五十八人楊元帥走嬰

源之裨帥汪同來降愈遣驍將王弼孫虎等因之進逼其城破殺其守將特穆爾布哈獲級三千餘婺源下得兵三千餘尋遣萬戶朱國寶徇高河壘下之遂由昱嶺關進攻建德破其長鎗元帥余子貞獲馬百匹追奔至淳安復大破之獲戰艦三十卒三千遂克建德以為嚴州進同僉行樞密院事破元將且揚之兵于烏龍嶺進僉書行樞密院事饒州下愈入守之數與陳友諒角有功進中書省叅政僉院如故兼總各翼軍馬愈乃廣布

上威德撫納降附左丞吳宏等皆自拔歸以兵取浮梁
走其叅政侯邦佐轉戰樂平敗蕭總管之衆獲萬戶彭
壽等諸屬邑皆下遂進圖洪都駐師臨川之平塘時吳
宏既已歸上因其兵使取撫州撫州帥鄧克明欲與宏
拒而畏愈強乃遣人詐獻地愈將以緩我愈詗得之即
率勁兵間道夜馳二百里黎明下其三門克明出不意
單騎走之傍邑自度不免乃以分省印及所掠撫州等
四路南豐等十八縣印詣愈降愈遂定撫州上進兵取

洪都降其丞相胡廷瑞平章祝宗同僉康泰等召愈以
步兵來會改江西行省叅政鎮之而命祝宗康泰仍故
官以所部從宗泰初不欲降迫胡廷瑞意怏怏不自得
又以愈秩卑不欲為之下而廷瑞既從上還建康從容
為言降故非宗泰意恐有變時右丞徐達方進攻楚乃
發使使以所部從行舟次女兒港遂謀叛掠商舟布為
旗幟夜趣新城門舉礮破之而入愈時居故廡訪司聞
變倉卒以數十騎走數與賊遇且戰且走從騎被殺且

盡愈窘甚連跨三馬馬輒踏幾不免最後得養子馬乘之乃得脫奪撫州門而出奔還建康以情歸于上上弗罪也而撫之右丞達兵復洪都走祝宗執康奉于是大都督文正開府洪都愈次焉明年陳友諒恣國師圍洪都號五十萬治戰艦高與城等文正約束將士乘城守而愈得撫州門最為要衝愈晝夜不解甲者三月餘而上來援大破其兵射友諒殺之圍始解論功與克敵等尋破平鄧青等二萬人于永豐從開平王遇春蕩臨江

之沙坑麻嶺十洞諸山寨圍贛州下之南安南雄韶州
諸路悉降進行省右丞尋進湖廣行省平章政事平章
位次丞相而愈時年二十八兵興諸大將蚤貴無有如
愈與李文忠者出鎮襄陽襄陽西接巴蜀南控楚北襟
河洛烽火旌壘相望愈披荊棘立軍府營屯練卒咸惠
甚著初建御史臺首拜右御史大夫時左大夫湯和討
方谷珍愈領臺事上書言便宜上慰而誨之于是大將
軍經畧中原而愈以征戍將軍畧定江淮未附州郡進

兵取唐州又取南陽生獲守將蔡國公史克新等遂取
隨州守將左丞王誠隆覆洪山之老馬劉寨斬獲以萬
計均房金商地悉平高帝即位立東宮愈兼太子右諭
德以征虜左副將軍從大將軍出隴右大破王保保于
定西悉覆其衆別將招諭河州土番大酋何索諾木布哈鄂
爾濟等請降其西烏斯藏等亦降皆入貢請受天子封
師旋大論功封開國輔運推誠宣力武臣特進榮祿大
夫右柱國衛國公歲祿三千石予鐵券子孫世襲又明

年以征南將軍討澧州等處溪洞蠻獠悉平之又四年吐蕃諸部為梗刼剽烏斯藏貢使輜重愈以征西將軍率都督同知沐英等往討之愈分兵為三道深入覆其巢窮追至崑崙山斬首捕虜以萬計鹵馬牛羊十餘萬捷聞上悅使使召還中道得疾卒上聞訃哭之慟輟朝三日喪車至三山門親臨奠行營視葬地以故塋隘改卜于城南西山之原葬事皆官給追封寧河王謚武順是役也都督英得封西平侯愈為人沈毅詳敏其事上

最恭慎有所委不憚危苦功成不矜敬禮賢士大夫上
心重之前後托寄親舊莫敢望焉有五子而鎮襲改國
申亦數將兵從大將軍卒年二十三無子弟銘為錦衣
衛指揮僉事有子源當後鎮而天永樂中子挺停襲挺
子炳弘治初復為南京錦衣衛指揮使卒子繼坤襲嘉
靖初繼絕世封定遠侯勛號階祿視懷遠侯卒子祖錫
嗣卒世棟嗣

弇州外史曰愈之初以敢戰深入名亡幾而建方面勲

最多而不甚偉然汗馬者無寧歲矣修爵上公帶礪六
王而以天死不獲終饗其奉或謂高帝末功臣鮮自保
者得天為幸是不然以愈之忠順勤勞雖為軍萬可也
外史曰余游襄陽陽人至今稱衛國公云

弇州續稿卷八十一

欽定四庫全書

弇州續稿卷八十二

明 王世貞 撰

文部

史傳

東甌黔寧東平三王世家

湯和字鼎臣濠人與上同里閭少孤卓越有奇志嘗從
羣兒嬉輒勒習部伍見者異之及長身長七尺餘多力

善射滁陽王之據濠也和從惡少年十餘人仗劍從之
遂隸麾下每出跳盪必當鋒還則殿後自百夫長從取
九灣再從攻定遠覆其師進千戶而是時高皇帝以王
壻寄肺腑請于王與和共事遂從取洪山寨得其兵八
百再進長萬夫復從下滁州為管軍總管復從取和州
當是時諸將皆高帝等夷莫肯為下而和長帝三歲顧
請執部曲禮上甚悅之元將陳頤森來寇和敗却其衆
從上渡江下采石定太平所部獲馬三百卒千人陳頤

森復來寇和擊其水軍流矢中左臂不為撓尋與中山
寧河二王自東門出甲轉戰至城北大破之遂擒額森
以獻別將下漂水從平建業復與中山王取鎮江進統
軍大元帥守之畧定金壇覆窩莊戍轉同僉樞密院事
從取常州為其守帥與張士誠境接時和頗好飲有酒
過嘗請事于上不獲允醉而有怨言謂其下曰吾鎮常
州如據坐舍脊左顧則左右顧則右誰能難也有言于
上者上隱之不發和亦大愧悔悉力拒士誠凡再破其

軍獲戰艦及馬以百十計遂從中山王大破士誠于錫山俘其梟將獲甲首五百又逐其將莫元帥走之虜其妻還拜中書左丞與中山王分省而治復同開平王解長興圍大破士誠之偽丞相士信軍超拜平章政事討平江西巨盜姚大膽遂西取永新州俘其左丞周安等籍其士馬歸于京師出守常州尋拔常州之戍于師從中山王討士誠進畧太湖降其僑館師轉戰湖州降守帥張右丞復降其吳江州將遂薄姑蘇圍之凡九閱月

而下上召見戟門論功賜帛九有副上即大位始建御
史臺為左御史大夫立東官為太子左諭德時方國珍
猶據溫台慶元三郡反覆未果下和以兵討而憾之走
海島進逼之悉得其眾以降遂移兵取福州時陳友定
猶為元守建寧城險兵勁和以征南將軍率諸將攻下
之虜友定以歸扈上幸汴梁遂同宋國公取懷慶澤潞
晉絳諸郡尋從中山王拔河中渡河入潼關趨鳳翔越
六盤山秦隴皆蕩平明年復從中山王大破元丞相庫

庫特穆爾子定西遂定寧夏追敵於察罕諾爾擒其猛將虎陳凱從之九月大封賞功臣與衛公鄧愈俱為御史大夫而和居左且年位久在其上以功不如僅封中山侯為開國輔運推誠宣力武臣榮祿大夫柱國歲祿千五百石始露其守常州時語和惟頓首謝過而已明年為征西將軍與副將軍廖永忠等以舟師自夷陵入峽攻夏夏發兵扼險不得進永忠趣之復不決而征北副將軍賴川侯友德自秦隴深入取漢中永忠乃決計

先入破其扼險之師長驅抵重慶和始繼之夏主明昇
以重慶降而友德亦定成都蜀平天子推功友德永忠
受上賞責數和逗撓而姑予之彩帛八和復頓首謝罪
又明年和以偏將軍從中山王北討分道擊賊戰于斷
頭山敗績失徹侯一人久之進濠州為中都鳳陽府命
和與太師李善長于其地建宮闕分置曹署以久勞于
外數賜璽書慰勞尋覽通州之外郭徙鎮彰德覽其城
上以和用兵數失利不任將而堅忍多智數又能與太

師善長抗故時委以綜理之任輒效且念其為里閭長者竟封為特進光祿大夫左柱國信國公議軍國重事歲食祿三千石與誥券與曹國公李文忠練卒于中都西巡至河州繕完其城郭營舍明年從中山王北伐覆灰山營獲其平章拉哩噶爾樞密副使嘉勒通又明年巡四川永寧之塘濠訓練其士馬久之五開山獠亂和以兵討之夷其穴鹵斬四萬餘時中山岐陽二王皆已物故上念天下承平無事不欲諸大將數典兵而和識其意

從容為上言臣老矣不敢稱畫繡願得歸故鄉為容棺之墟以待骸骨上大悅立賜寶鈔伍萬錠治第于中都尋悉為諸功臣魏鄂曹宋潁涼諸國公徹侯治第皆極宏壯既而謂和日本叢爾夷而數為侵盜我不欲與之爭固我封戍而已卿雖老強為朕一行于是使和行視山東登萊淮揚吳越閩嶺濱海要害築城凡數十民取一丁為兵戍之和竣事而新第成和率妻子陞辭賚黃金三百兩白金二千兩鈔三千錠綵幣四十有副又賚

其夫人黃金二百兩白金一千兩鈔五百錠綵幣三十有副夫婦皆賜璽書褒諭其又明年魏曹等六公還鄉賜皆如信公而夫人不與焉自是和與諸公侯歲一朝京師朝必有宴賞及道里費而諸公侯猶不時遣鎮各邊及將兵討伐獨和以老不在行而上愈愛之且安之其後入朝忽病中風不能言上聞即日幸其第撫視惋歎良久遣還里疾小間上使其子前軍都督僉事鼎迎至都俾以安車入內殿與酣宴而出賚金帛御膳法酒

相屬最後復大朝疾寢劇不能興上復令以安車入內
手摩撫其體與叙里閑舊及艱難勞勩和不能對稽首
而已上為之雪涕出藏錕付有司為營葬地明年卒年
七十追封東甌王謚襄武和有五子長即鼎前卒追封
信世子餘三子亦前卒而少子醴積伐至同知左軍都
督府征五開道卒于軍有孫十一人而弗及嗣六世孫
紹宗孝宗朝錄功臣後為南京錦衣衛指揮使嘉靖中
繼絕世封靈璧侯凡三歲而卒佑賢嗣卒子世隆嗣領

漕事者十餘年以勞加少保太子太保

弇州外史曰以湯信公之戰伐其績何寥寥也一逗撓一不利毗陵酒語至煩廷訓而其後乃爵上公贈真王便蕃之錫諸勛舊不敢望焉豈亦以綰寂布衣之契故重耶顯融令終美哉乞骸一語基之矣夫以絳侯勃之定策有社稷勲而煩人主詔乃怏怏之國彼其君臣俱失之也詩云既明且哲以保其身斯信公謂矣外史又曰余嘗按行登萊海上及宦游吳越間其父老歷歷指

烽戍云湯信公功不廟滅哉微信公吾其鯨鯢食矣
嗟乎高皇帝之善器使也

沐英者鳳陽之定遠人父早亡育于母母復亡上
起兵收而子之既長溫輿有姿緊機穎過人初與李
岐陽等俱冒國姓賜名文英差次皇從子文正
數從上征伐入侍帷幄晝夜勤勵目無迂視上心器
之十八用為帳前都尉從守鎮江居四歲擢廣武衛
親軍指揮使軍政脩飭加授昭勇大將軍以所部從

下福建擒平章陳友定有功歸其姓沐而單名之
曰英出鎮撫建寧三郡亡何擢鎮國將軍僉大都督
府事明年進榮祿大夫同知大都督府事時都督
不為階官而英特受上心膂托佐李岐陽為政益精
明中宮尤愛重英恒語上曰此兒吾子孫屏翰也
久之命乘傳繇陝西巡行諸路布上恩惠事有不便
者輒更置而後聞且使練諸部兵以待明年遂副
寧河王征西番西渡黃河略烏思藏耀兵至于崑崙

轉戰數千里俘虜士卒以萬計馬駝牛羊十倍之師還而寧河王道卒英代將其衆還京師封西平侯進號開國輔運推誠宣力武臣勲柱國食祿二千五百石賜鐵券又明年拜征西將軍窮追西番降元萬戶且實勒戢樞密副使舒多爾濟道溫都爾卒二萬餘雜畜二十餘萬平朶甘朶爾七站地數千里復率所部蕩和林轉畧額齊訥渡黃河登賀蘭擒伏聽者得穹廬所止涉流沙分兵四翼薄其營自率精騎衝中堅大破之獲大帥國

公托和齊知院謁足履其全部明年以所部從大將軍
出古北口襲公主山寨掩四部卒渡驢胸河獲知院李
宣亡何以征南右副將軍同潁川侯傅友德永昌侯藍
玉下雲南繇辰沅出羅鬼遂躡普安至白石江梁王巴
咱爾幹爾密遣其司徒達爾瑪選甲十萬來拒潁川侯
欲濟師英以諸軍嚴陣若渡者而奇兵潛從上游遶出
敵後敵陣動大軍乘而擊之勁戰自旦至晡蹀血震蕩
英與潁川永昌二侯多縱鐵騎橫貫而威之生縛達爾

瑪敵大潰僵屍百里相屬直抵雲南悉收其金寶子女
分徇諸郡皆下獨大理猶為元守英與永昌侯攻之其
帥段世據龍尾關為固英分一軍夜從間道登點蒼山
襲其背質明英麾騎亂流至關壯士被羽先登關破伏
兵從後夾擊擒段世拔大理移兵取車里平緬不浹月
雲南郡邑悉平分省列衛戍簡置守令勸課農桑復與
潁川侯分道平東川烏蠻寇而夷兵叛者合圍雲南守
帥馮誠等告急英簡萬騎馳救之賊夜遁乘勝急擊遂

悉復曲靖永昌之失守者詔英留鎮雲南而名潁川永昌二侯還潁川侯進封公英自如英鎮之三歲而破平摩沙勒斬首千餘級亡何麓川宣慰思倫發聚其衆來寇號三十萬英選卒三萬拒之甫對壘使都督馮誠以輕騎三百壓而挑之賊以萬衆乘二十象來戰誠一戰殺數百人獲一象而返英喜曰賊不足平也明日賊悉衆擁百象來鬪象皆被甲負戰樓四周若欄楯挾大竹為筒于兩傍筒置短鎗十餘以慄我英分卒為三隊命

都督誠為前鋒都督寧正將左都指揮湯昭將右各以
火炮神機槍弩奮前擊賊矢石齊發呼聲震天地象皆
却走英督大軍乘之賊遂大潰斬首三萬餘級俘萬人
生獲四十七象餘皆被矢如刺蝟以死賊帥刁斯郎等
皆伏殪象背羣蠻震聳稽顙奉貢不敢復為梗明年復
平東川破走叛首阿資入朝錫宴于奉天殿賚黃金二
百兩白金五千兩綵幣百襲鈔五千錠陞辭上撫之曰
使我高枕而無南顧憂者爾也英歸鎮復大破阿資衆

走之使使以兵威折脅八百國并諸番有重譯貢者時懿文皇太子薨英故嘗侍東宮有恩誼聞之哭嘔血一日方坐堂皇理事忽中風卒訃聞上慟哭輟朝命以喪歸賜葬都門外追封黔寧王謚昭靖蓋異數也有五子其一子早卒而三子遞鎮雲南而少子昕尚太宗公主為駙馬都尉屢掌南京都督府以壽考終惠襄侯春者英長子也年少有才武嗣英侯繼鎮雲南嘗破擒叛人阿咱爾卒年二十六無子弟晟嗣晟字景茂少凝重端慤

寡言笑愠喜不形于色而質穎敏讀書強記高皇帝甚重之甫冠即授後軍都督僉事亡何進左都督以勤慎稱既嗣侯即代為雲南大帥時岷王之國雲南嘗與晟交惡上貽書王謂晟少孤不練事毋深責之吾當別飭晟然卒以王他故徙國楚獨晟自如建文帝之自焚也文皇帝意其由地道以出或言匿晟所者使使詞察無狀乃獲免麓川之宣慰使不能制其下諸蠻逐之而擅其地晟以大兵討平之分其地為孟養木邦孟密三府

鎮沅威遠二州平涯潞江清甸大侯者樂五長官司而
歲徵其貢賦又于潞江之西置騰衝千戶所以控之夷
遂帖息八百國之長使其獠帥以蠻衆來犯歲發兵使
別將令逆擊之而自犄其後至蒙自蠻退走追之獲其
帥賜璽書侑以金幣文皇帝之四年安南之逆臣黎胡
套弑其君而戕我使者天子討之晟為征夷左副將軍
率雲南諸衛所土漢兵由蒙自徑野蒲斬木通道以入
前鋒奪猛烈棚華關隘賊散走造舟以濟師分遣所部

據澳泐寺沙舁舟夜出洮水步騎夾之遂渡富良江與
征夷將軍新城侯輔兵合破多邦城柵繼擣其東西二
都及盤灘困收櫓江仙侶等賊悉蕩平之胡奎及其父
偽上皇季犛狼狽棄其衆獨携家屬及左右心腹遠遁
歲等窮追至日南州奇羅海口擒獲無遺得郡四十八
縣百八十六凱從入朝論功賜號顯忠輔運推誠宣力
武臣階特進榮祿大夫勲右柱國封黔國公歲祿三千
石子孫世世勿絕賜券玉帶金幣寶鈔既大宴上御

製詩褒美之再宴于便殿還鎮雲南無何胡奎之餘孽
偽上皇簡定作亂命晟兼征夷將軍討之不利于是英
國公輔以征虜副將軍率兵合而破之獲定等檻送京
師伏誅召英國還偽王陳李獮等尚未平晟連戰不能
下輔復捕李獮等送京師晟亦受賞白金三十斤寶鏹
三萬錠綵幣三十有副尋撫富州叛酋降之仁宗即大
位召還宴勞賜金幣加太傅還鎮自是宣英二帝嗣位
賞亦如之麓川思任發反侵畧騰衝南甸詔諭之降不

從晟使都督方政等為前鋒而大軍繼其後破平景罕
等寨斬首三千餘級獲象二十餘政恃勇以輕騎前搏
賊敗績死晟退師至金齒詔還鎮內慚懼得疾至楚雄
而卒或云懼伏毒也詔官為治墓賜祭追封定遠王謚
忠敬晟應變非所長其戰數不利而天子以絕遠且世
將藉而隱焉滇人攝服晟父子威信莊事之無異人主
每片帑下土酋所具威儀出郭迎迓盟而後啟之曰此
令旨也歲時奉獻不絕晟父子前後置圃墾田業三百

六十區日食其一可以周歲珍寶金貝充牣庫藏幾敵天府後庭曳羅綺者恒數百人役使閹奴亦可數十百而善事中貴多通遺執政不絕亦能檢制其下晟有子斌斌尚幼嗣公不能將其軍于是晟弟昂以都督同知佩印代鎮復討麓川不利定西伯蔣貴等兵與合始平之昂得遷為左都督賜金幣加等卒贈定邊伯謚武襄斌嗣公之十一年薨贈太傅謚榮康子琮幼不克嗣于是從兄璘以才舉為右都督代鎮卒弟璿為都督同知

復代鎮前後凡十五年而琮始嗣公又明年始佩征南將軍印為鎮守嘗捕獲叛酋尋甸守安倘廣西守昂前後平馬隆麗江劔川順寧羅雄等蠻臨安之昌明缺箐赤石崖羅羅大發兵討獲賊帥師五等累賜敕褒獎加太子太傅嗣公凡三十二年而卒無子以都督同知瓚之孫都指揮誠之子崑嗣朝議以崑為西平侯之裔孫當從侯爵而守臣爭之謂南人知黔國公不知有西平侯也侯之恐為所輕崑十四歲而拜公爵尋以征南將

軍鎮守發兵平龜山竹箐蠻諭定孟養孟密之爭寨者
又合川貴二鎮兵平米魯亂再擒師宗州賊張長受南
安亂酋那代三賜璽書褒諭再益歲祿百石加太子太
傅嗣公二十四年卒贈太師謚莊襄子紹勲嗣公十六
年而卒子朝輔嗣十一年而薨父子皆加太子太傅贈
太傅二子融鞏皆甫襲而殤朝輔之弟朝弼當嗣虐其
嫂且錮之不使還南京于是上疏相訐久之始得襲佩
印鎮守其淫惡益甚且屢拒王命詔削其爵以子昌祚

嗣且代鎮而朝弼復欲殺其子逮至京錮于南京之故第以幽死

弇州外史曰人言黔寧王為高帝外婦子非也帝長子英十五年當英之生帝方寡孤安從取外遇哉英以慎靜饒兵畧為天子軍路藍縷以開滇土晟武則不競而德繼之世保赤社為明藩屏夫豈一朝一夕之所致哉朝弼錮死昌祚嗣興法與恩不相蔽明德衷且遠矣

朱能字士弘鳳陽之懷遠人父亮從高皇帝起兵積戰功至燕山中護衛副千戶早卒能生而魁竒怪偉勇力異恒輩既代父官為燕王所愛重嘗從王北伐取元太尉多爾濟布哈覆其軍建文初王以強大見猜天子使三司諸大吏謀逮之勢且迫王猶隱其事能與張玉丘福直入倡言曰大王高皇帝親嫡子最長而賢武朝廷不察乃以吳淞見擬今諸宧謀定矣即無論大王我曹亦安能坐待菹醢也王乃決而與能及張玉丘福謀因三

司入謝宴伏兵執之遂分率虎騎八百奪九門綏撫城
中外三日大定從王攻薊州先登拔其城虜其將都指
揮馬宣等乘勝取遵化永平密雲諸邑東畧地抵灤河
還從擊雄縣復先登入東門破長興侯耿炳文之前鋒
九千人追之至月漾橋虜其副帥都督楊松潘忠等遂
追殲餘衆于鄭州乘勝長驅至真定與長興侯之大軍
遇能挺丈八矛圍二拱餘從敢死士二十餘騎突入其
陣瞋目大呼所嚮皆辟易王麾衆乘之遂破其陣斬獲

數萬追奔至渾沱河敵餘衆尚數萬人能復大呼馳而
躡之遂潰生俘三千餘盡死王大悅賜書褒獎尋從援
永平解其圍追敗江陰侯吳高之卒二十餘萬復從定
大寧僂其扞命者挾壯士還而曹國公李景隆以五十
萬衆攻北平晝夜不息能從王入援遇于鄭村壩力戰
大敗之進攻其營又敗之急擊景隆兵之營九門者城
中亦出兵夾擊敵遂潰去所遺軍資甲仗以巨萬計從
畧定廣昌蔚州大同敗其師而景隆悉鳩其亡散并未

傳者號百萬來攻王親拒之以能為前鋒晨發而馳午至白溝河摧其都指揮平安軍及申復大敗其軍明日以左哨當敵前鋒復大敗之盡拔其寨柵窮追至濟南復大敗之得其降卒萬人聞于王悉縱使歸復從下滄州先登由東門入鹵首六萬獲其總帥徐凱進攻東昌與盛庸兵鏖勝負畧相當王以數千騎突出敵後敵知其為王騎也悉眾圍之短兵接幾不能出能奮力翼王潰圍而出我大軍遂進戰夾河能以奇兵為軍鋒冠遂

大敗盛庸兵又敗平安兵于藁城追奔至真定戰東門
斬首萬餘乘勝畧彰德及定州掩水西寨已而敗敵將
李文于德州遂克東河進克東平搗汶上諸寨設伏敗
平安之衆十萬餘轉戰至小河王兵不利與諸將議咸
氣鬱請班師能獨進曰漢高帝與項王百戰百不利而
竟奪項王之天下今僅一不利耳而遽旋旆者何也且
旆一旋可復至此耶王乃奮曰從余馬首而南言壯者
斬遂縱兵深入至靈壁敵悉衆來戰能與丘福復先登

陷陣大破之虜平安及陳暉馬溥徐真等三十餘將僵屍蔽原野降者數十萬人獲馬二萬匹進克泗州渡淮敗盛庸兵遂取揚州渡江斬金川門闕而入遂定京師王即大位而能已前積功遷至都督僉事矣第封能為第二人遂授奉天靖難推誠宣力武臣特進榮祿大夫右柱國封成國公為左軍都督府左都督歲祿二千五百石賜誥命鐵券貂蟬冠朝服玉帶兼金綵幣寶鈔皆與淇國公丘福同而幣殺其二又明年立皇太子能遂

為其太傅再加歲祿一千石又明年而安南黎氏弑其主且拒皇命詔拜能征夷將軍統左右副將軍左右叅將及神機橫海驃騎游擊五將軍兵八十餘萬往討之上親禡旗于龍江宴餞能等既抵廣西而能病癘以兵屬副將軍新城侯輔而卒上時已覩星象而怪之謂侍臣曰西師其有憂乎朱能智足辦也意者北人不習暑耳俄而訃聞上震悼輟朝五日諸公侯宿將入慰上為洒泣曰輔吾成大業者能也且其心行當遠到胡以止

此言已益酸楚左右皆泣莫能仰視親為文祭之辭甚
哀官為治葬追封東平王謚武烈能卒時年僅三十有
七又四年而有淇國公福臚胸河之敗淇國公福者丘
氏亦鳳陽人高帝時積戰功為燕王護衛百戶有膂力
艱朴勇鷙不甚曉文義而善撫士卒得其心燕師之初
起與千戶朱能俱為王所憑倚其募畫志計不能如張
玉而敢力戰深入過之每勝敵諸將爭前效鹵獲而福
後王每歎曰丘將軍功我自知之京師平福已累擢至

中軍都督僉事矣大封賞功臣第福為首賜號奉天靖
難推誠宣力武臣階特進榮祿大夫勲為右柱國爵為
淇國公職為中軍左都督歲祿二千五百石當是時曹
國公李景隆以降臣位福上福意弗悅也景隆尋坐嫌
長繫福益快而是時世子當立為東宮漢王高煦數將
兵從上征伐有功以為類我而最被寵者獨趙王高燧
意未決福武人與高煦善而欲立之中貴人黃儼江保
與駙馬都尉李讓等窺上指陰主高燧世子憂之甚賴

仁孝皇后內主而上念世嫡皇孫材謀之學士解縉始
得立而福首為太子太師明年加歲祿一千石時北敵
布尼雅鋤哩殺我使臣給事中郭驥上大怒發精騎十萬
拜福征北大將軍率左右副將軍武城侯王聰同安侯
和真叅將靖安侯王忠安平侯李遠等討之福先驅至
大漠遇敵前鋒以輕騎千餘摧敗之遂前進武城安平
二侯諫曰敵非真敗也伏以誘我且後兵尚未集如何
福怒而按劍曰豎子沮衆耶唯余馬首違者斬前薄臚

胸河敵騎益衆福顧勢不敵乃使同安侯前為質同安侯者故胡騎帥也既行而福率帳下士從後將襲敵敵覺遂張左右翼而圍福等皆殺之因急擊其後軍亡脫者所失亡數萬上聞之大怒以福愎諫失策籍其家發海南而傾天下兵北伐凡三駕而卒莫能克敵後每言及福輒切齒至洪熙改元福當從死事例牽復而以善高煦故都不復錄其子孫遂為海南人福長子能二十六歲死時年六十七能卒之明年而子勇嗣上憐能之

為靖難首功天且死事幸及其壯而將之勇長身賴面
虬鬚戟張見者皆目屬而中實恒怯亡他技顧頗折節
禮士大夫以是負儒將聲歷掌都督府上北征使佐仁
宗監國頗見禮重久之始從北征將右掖兵宣德初從
平漢庶人復從征沙漠所部頗有斬獲第功加太子太
保時上以太師英國公張輔位望尊重不欲使掌六師
而命勇代之勇亦初自強振刷有生彩其後則漸怠且
不免有所腴削望實俱損而以善事中貴人故得久其

位握兵符者凡二十餘年嘗與諸將軍分道出擊朵顏諸衛勇由喜峰口襲敗之富裕川又追及于熱水鹵其人畜數百千而還言者猶謂非計得不償失而中貴人王振隱之進太保敵額森大舉犯宣府上親討之以勇為大帥時中貴人振擅權上春秋幼冲進止悉委焉每呼勇受事長跪惴惴惟謹六師駐土木而敵來轉逼詔勇與西寧侯宋瑛駙馬都尉井源等騎卒四萬逆擊之俱敗死車駕遂蒙塵時兵部尚書于謙等叅論勇罪奪

其封久之始予子儀嗣歲祿僅千石至上由南城返正
曲赦諸失事者王振復官賜祠而賜勇祭如例以衣冠
葬復追封平陰王謚武愍儀字廷垣器宇凝重英宗既
返正見而器之謂曰平陰王有子矣自是有所任使皆
稱久之命提督南京守備掌中軍都督府者凡三十四
年加太子太傅以老成靜謚稱卒年七十贈特進右柱
國太師謚莊襄子輔嗣嘗屢掌都督府加太子太傅守
備南京召還以平北將軍率師扞敵敵退還京師卒贈

太傅謚恭僖子騏嗣使承天卒于道無子介弟鳳嗣提督南京守備兼掌中軍都督府以疾卒子希忠甫二十一而嗣公美姿容善舉止沉靜不苟為世宗所器重數更委任掌右軍都督府再掌後軍提督十二團營及五軍營兵馬一為都護將軍屢充皇天后土及皇后貴妃皇太子親王冊禮使入直無逸殿應制撰草再加經筵及監脩國史代郊天者三十有九方澤者二十有九其官自太子太傅以至太傅再加兼太子太師最後進太

師其錄蔭子弟為錦衣指揮千戶三人其加祿奉至七
百餘石賜肩輿入內府乘馬玉帶蟒繡麒麟袍其賚予金
幣雜綵翎翻寶器甲仗之類不可勝紀卒年五十八追
封定襄王謚恭靖其弟希孝以兄蔭得官積官亦至太
保兼太子太傅卒贈太傅謚忠僖其嗣希忠公者時泰
不半歲而卒子應禎嗣後以例奪王

弇州外史曰靖難之初起稱首功者獨淇公福成公能
而已然天子親為大將每戰必在行而二公者雖計畫

血戰之績多然昌能一仗旄節出號行罰哉受脤南北
為大將帥能薨于師天寵蒞被福敗而殞坐違節制寧
唯弗旌罰乃及嗣平陰失律乘輿震躓寵以真王母廢
世祀覆敗同軌賞罰殊執嗟乎君猶天也天之未定誰
能議之昌不曰何以章軌後世

弇州續稿卷八十二